

L'INTERVENT DEL NEF PRESIDENT

Antone Pollam: »Tegnir adum duc i ladins de la Dolomites«

Union anter la valèdes e ladin dolomitan l é anter si prumes obietives, con gran speranza ti joegn

Antone Pollam l é fascian da Vich, l é del 1952 e l é militant ladin da 50 egn.

L é stat per 20 egn president de l'Union di Ladins de Fascia, de chela che l é restà president de onor, e per 10 egn l é stat ence president del Istitut Cultural Ladin.

No l à podù tor pèrt de persona a la Radunanza Generela olache l é stat lità president, ajache l era demez per n viac jà programà da temp.

L à portà tras n video sie message de salut olache l à palesà si obietives..

»Me endespiasc de no poder esser a la Radunanza Generela – l à dit – percheche Milva Mussner, a chela che ge die n gran detalpai de cher per dut chel che l'à fat te chisc egn

de si presidenza, la me à domanà de tor su chesta enciaria.

Ve diré che me la enveide mingol, ajache ge jir do a le pedie de Milva, e dant da ela voi recordar ence de Ilda Pizzinini, sarà belebon senester.

Tegnir adum duc i Ladins de la Dolomites despartii te doi region e trei provincie no l é sori. La despartijon voluda dal fascism la peisa amò anchecondi, purampò l é ence segnai positives, che vegn dai joegn: te la taula torona che l é stat enstadi via Rèba duc ensema chisc joegn da Fascia, Val Badia, Gherdena, Fodom, Col e Ampez i à palesà la vola de star ensema, de restar ensema e de portar inant l lengaz e la cultura ladina. Chesta l é na gran speranza per l davegnir.



Antone Pollam, l president nef dla Union Generela di Ladins dla Dolomites, te sie salut video.

I ladins l é n picol popul che fasc part del mosaich de popui de duta l'Europa, che vel viver e che à tras vivù en pasc coi vejins, con taliegn e todesc. I à padi, soraldut endana la Pruma Vera, purampò i é jic inant e la voa de star ensema la é amò grana.

Per chest l é emportant soraldut ge tegnir a nosc lengaz, e sun chest volesse sottrissar l'emportanza de n ladin scrit unitar, l ladin dolomitan. Rejonon nesc idiomes de paisc e de val, ma canche l é da scriver, soraldut ti ac ofiziai e su La Usc di ladins, fossa benfat durar de più l ladin dolomitan.

Chest posse dir che l é chel che volesse soraldut portar inant: l'unità e l lengaz. Devalpai!« 16